



Járngerður

Fréttabréf Grindavíkurbæjar

1.tbl. 4.árg. Mars 2003

Meðal efnis

Fjárhagsáætlun 2003

Rekstur málaflokkar

Efnahags yfirlit 2003

Sjóðstreymi 2003

Helstu verkefni

Lautarhverfi

Íþróttir

Fréttabréf Grindavíkurbæjar
Ritsjóri: Kjartan Kristjánsson
Ábyrgðarmaður: Ólafur Órn Ólafsson



Fjárhagsáætlun 2003

Á fundi bæjarstjórnar Grindavíkur miðvikudaginn 29. janúar s.l. var samþykkt fjárhagsáætlun Grindavíkurkaupstaðar og stofnana fyrir árið 2003.

Helstu niðurstöður fjárhagsáætlunar eru að heildartekjur eru áætlaðar um 788 milljónir króna en þar af eru skatttekjur um 666 milljónir króna. Rekstrargjöld samtals eru um 798 milljónir króna og fjármagnsliðir nettó um 23 milljónir. Rekstrarniðurstaða ársins er því tap á rekstri um 34 milljónir króna.

Árið 2003 er annað árið sem rekstur bæjarsjóðs er gerður upp með svipuðu sniði og rekstur fyrirtækja. Eignir hafa verið metnar og færðar á efnahag. Afskriftir síðan færðar á rekstur. Afskriftir bæjarsjóðs og stofnanna er um 90 milljónir króna á árinu 2003.



Rekstur helstu málaflokka

Rekstur málaflokka er áætlaður um 768 milljónir króna og tekjur málaflokka um 57 milljónir króna.

Rekstrargjöld helstu málaflokka eru þessi:

- Fræðslu og uppeldismál kr.372m
- Æskulýðs og íþróttamál " 116m
- Sameiginlegur kostnaður " 81m
- Félagsþjónustan " 42m
- Umhverfismál " 27m
- Skipulags-og byggingamál" 26m
- Menningarmál " 24m
- Umferðar og samgöngumál" 21m
- Hreinlætismál " 20m
- Bruna og almannavarnir " 17m

Áætlað Efnahagsfirlit 2003

Samkvæmt efnahagsfirliti eru heildareignir Grindavíkur-kaupstaðar og stofnanna um 2,6 milljarðar króna. Fastafjármunir eru þar af um 1,6 milljarður króna. Eignahlutir í félögum eru bókfærðir á um 800 milljónir. Skammtíma-kröfur eru áætlaðar í lok árs um 113 milljónir króna. Heildarskuldir eru um 1,3 milljarðar króna. Þar af langtímaskuldir um 1 milljarður króna en skammtíma skuldir um 59 milljónir króna. Lifeyrisskuldbindingar eru áætlaðar í árslok um 180 milljónir króna.

Áætlað sjóðstreymi 2003

Peningar frá rekstri eru áætlaðir 61 milljón króna á árinu. Fjárfestingar á árinu eru áætlaðar 38 milljónir króna. Afborganir langtímalána eru 132 milljónir. Til að ná endum saman þarf að taka lán á árinu að fjárhæð um 92 milljónir auk endurgreiðslna vegna hafnarframkvæmda sem bærinn hefur lagt úr fyrir að fjárhæð um 93 milljónir króna.

Helstu Verkefni ársins

Opin leiksvæði:

Gert er ráð fyrir nokkrum endurbótum á leiksvæðum bæjarins. Heildarkostnaður um 2 milljónir króna.

Hreinsunarátak:

Fyrirhugað er að vera með almennt hreinsunarátak í bænum í vor. Ákveðið hefur verið að verja 1 milljón króna til hreinsunarátaks í bænum. Átakið verður auglýst sérstaklega.

Deiliskipulag:

Á árinu verður haldið áfram með deiliskipulag svæðis norðan stjórnsýsluhúss. Farið verður í deiliskipulag á íþróttasvæði og svæðinu við Víðihlíð. Heildarúttekt er áætluð á hringtorgum og umferðarmálum. Deiliskipulagskostnaður er áætlaður um 10 milljónir kr.



Viðhald gatna:

Stærstu verkefnin í viðhaldi gatna er malbikun á Selsvöllum og Bakkalág auk viðgerða við Hafnargötu. Viðhaldskostnaður gatna, gangstéttu og stíga er áætlaður um 16 milljónir kr.

Viðhald húseigna:

Eignasjóður sér um rekstur og viðhald á húseignum bæjarins. Áætlað er að leggja 6,1 milljón kr. í viðhald á Grunnskóla Grindavíkur og 3 milljónir í Leikskólann við Dalbraut. Viðhald og umhirða íþróttavalla er áætlað 3,6 milljónir kr. Heildarviðhaldskostnaður Eignasjóðs er áætlaður 22,6 milljónir kr.

Nýframkvæmdir:

Eignasjóður hefur með höndum kaup á varanlegum rekstrarfjármunum og aðrar nýframkvæmdir. Nýframkvæmdir gatna, gangstéttu og stíga eru áætlaðar um 37,4 milljónir kr. Tekjur vegna nýframkvæmda eru áætlaðar 12,5 milljónir í gatnagerðargjöldum. Aðrar eignfærðar fjárfestingar Eignasjóðs eru áætlaðar 6,8 milljónir kr.

Nýráðnir starfsmenn Eignasjóðs:

Jón Guðmundsson hefur verið ráðinn

sem umsjónarmaður eignasjóðs. Hans hlutverk er að annast og sjá um að eignum bæjarins sé vel við haldið. Jafnframt hefur Björgvin Vilmundsson verið ráðinn sem aðstoðarmaður Jóns. Sími hjá Jóni og Björgvin er 695-5211

Lautarhverfi, úthlutun lóða

Eftirfarandi lóðum var úthlutað: 5 lóðum til byggingar einbýlishúsa á einni hæð. 6 lóðum til byggingar einbýlishúsa á 2 hæðum og 2 lóðum undir raðhús með 5 íbúðum hvort. Einungis er einni einbýlishúsalóð óúthlutað. Hverfið verður tilbúið til byggingar 1. júní 2003. Gatnagerðin var boðin út og var gerður samningur við Heimi og Þorgeir ehf. við gatnagerð í hverfinu. Vinna þeirra gengur vel og eru þeir á undan áætlun.

Höfnin

Skipað var upp 1600 tonnum af salti úr Wilson Tees í síðustu viku. Mikið hefur verið um komur loðnubáta til löndunar hjá Samherja hf. Síðastliðið ár var metár í lönduðum afla í Grindavík en alls bárust á land 157 þús. tonn. Árið á undan hafði einnig verið metár en þá var landað 135 þús. tonnum. Mokveiði er hjá línubátum en tregt er í netin, mikil ótíð var í febrúar en veður hefur verið skaplegra í mars.



"Grindavík ... góður bær"

Borgarafundur um umferðamál

Bæjarstjóri Grindavíkur mun halda borgarafund um umferðamál 20. mars n.k. í fundarsal Grunnskóla Grindavíkur kl. 20.00. Menn eru hvattir til að mæta og fylgjast með.

Fyrsta alþjóðlega skákmótíð

Fyrsta alþjóðlega kvennaskákmót á Íslandi var haldið í Saltfisksetri Íslands í Grindavík. Landslið Íslands, Frakklands og Noregs öttu þar saman sínum bestu mönnum. Var það í tilefni þess að Taflfélag Garðabæjar og vaskir menn úr Grindavík hafa tekið höndum saman og stofnað Skákfélag Grindavíkur. Samtímis var haldið Þorbjarnar-Fiskaness skákmót þar sem sameiginlegt lið TG/SK tefldi við landsliðin. Á laugardaginn og sunnudaginn var fjöltefli og mátti þar sá framtíðar skákmeistara Grindavíkur tefla.

Björgunarsveit Þorbjarnar

Björgunarsveitin er búin að standa í stórræðum síðustu daga. Þann 17. febrúar var mjólskipinu Trinket bjargað úr innsiglingunni og í sömu viku var Draupnir GK dreginn í land eftir að hafa farið á hliðina.



Til hamingju með deildarmeistaratalitilinn

Haukarnir voru teknir föstum tökum mánudaginn 3. mars þegar Grindavíkingar unnu deildarmeistaratalitilinn í körfuknattleik. Helgi og Guðlaugur voru með 3ja stiga sýningu í leiknum og rötuðu 6 af 7 skotum ofan í körfuna, 86% nýting hjá þeim báðum en alls voru 18 þriggja stiga körfur gerðar. Páll Axel tók þátt í sýningunni og setti niður fjórar þriggja stiga körfur. Með mikilli vinnu og hörku tókst að vinna Haukana með 25 stiga mun, 105-80. Titillinn í höfn í þriðja sinn. Við óskum meisturunum til hamingju með sigurinn.